

## Transkription von Urkunde PRE 1378d

Ort, Datierung: Prenzlau, 1378-08-15

Signatur: Brandenburgisches Landeshauptarchiv in Potsdam, Rep. 8, U 120:

Wir Sigismund van gotes gnade markgrafe tzu brandenburg vnd des hiligen Romischen riches obirster kamerer / Bekennen vnd tun kunt offentlichen mit dessem briue allen den die yn sehen oder horen lesen daz wir vnß Bur=/gern der Stat premslaw die nu seyn vnd noch tzu komende sein vnß lieben getrewen befestet vnd bestetiget / haben beuesten vnd bestetigen mit dessem briue alle ire freiheit alle ire rechtikeit vnd alle ire alde gewon=/heit vnd woll(e)n vnd sull(e)n sie lassen vnd behalten bey eren vnd gnaden dar si in vorgangen tzeiten sint gewe=/sen duch woll(e)n wir vnd sull(e)n yn halden alle ire briue die si haben von fursten vnd furstinnen vnd woll(e)n / vnd sull(e)n sie sunder allerley hindernusse lasen vnd behalten mit allen gnaden mit aller freiheite vnd rehti=/keit bey allen iren lehen eigen vnd erben als sie das vorgehabet haben vnd besessen duch woll(e)n vnd schullen wir / Ritter knappen Burgern vnd geburen mit allen luten gemeynlich beide geistlichen vnd wertlichen halden alle ire / briue vnd woll(e)n sie lasen by irer freiheite by allen rechten vnd gnaden duch sull(e)n vnd wollen wir vnd vnß noch / komelinge des mit nichte tu staden vwlworden ? noch gûnnen dat sie oder ire nachkomelinge vt irer Stat geladen / werden an vmb hantheftige tate sunder si sull(e)n tzu rechte stan vor irem Schultem wer et auch das en oder iren / nachkomelinghen eyne brieffe vorgiengen vnd vorgangen weren dy sull(e)n wir vnd vnß nachkome=/linghe von worte tu Worten nach dem lute der briue als sie gewesin sein widergeben veruewen vnd bestetige(n) / on gift vnd one gabe vnd ouch das sie von vnß amptleuten ny(m)mer in kemen ziten geirret gehindert oder / gekrenket noch von der marke gewiset sull(e)n werden in keiner weis sunder sie sull(e)n daby vngehindert vn=/gewret vnd vngekrenket ewiclichen bliben in aller masse als sie von alders her geweset sin vnd als si / des van vnßin liebem vater keiß karl vnd van dußin lieben brude her wenzlaw Romischer konig vnd konig / tzu Behenn vnd von allen vnßin vorfarn Markgrafen tzu Brandenburg brieffe haben ant vrkunde ditz briues / versigelt mit vnßin Jnsigel Geben czu premslaw nach cristus geburte driczenhundert iar darnach in dem acht vnd sibenzigsten Jare an vnß vrowen tage geheisen assu(m)pcio